

Reintroducir il bus da notg Steila Surselva – per la giuventetgna sursilvana

Cun quella brev aviarta vulein nus far attents silla munconza d'ina purschida da bus da notg en Surselva. La pandemia da Covid-19 ha pretendiu bia da nus tuts. Duront entgins meins havein nus tuts stuiu desister da bia caussas. Denter auter han numerusas occurrenzas saviu vegnir realisadas mo a moda limitada ni insumma buca. Interacziuns socialas han stuiu vegnir reducidas sin in minimum. Specialmein pertuccai dallas consequenzas ein ils giuvenils stai. Quei damai ch'els sesanflan en ina vegliadetgna en la quala lur ambient social gioga ina impurtanta rolla per lur svilup e per lur beinstar

Pervia dils eveniments enconuschents ei il bus da notg «Steila Surselva» vegnius sistius igl unviern 2020/2021 tgei ch'ei nuot auter che capeivel. Medemamein igl unviern 2021/2022 pervia dalla malsegirtad pertuccont il svilup dil diember da cass da corona. Per il proxim unviern dat ei aunc neginas informaziuns ufficialas dall'administratura da quella purschida, la Regiun Surselva.

In basegns

Il Giuven Center Surselva vul cheutras render attent alla problematica ed al basegns dalla gliעד giuvna dalla Surselva per in bus da notg: Sco constatau a caschun da numerusas occurrenzas ch'ei vegnidas organisadas la stad vargada e che han era aunc liug actualmein, separticipescha la societad – e cunzun era la giuventetgna – a talas occurrenzas. Era numerusas uniuns da giuventetgna ella regiun ein – probabel era per part encunter quei ch'ins ha pudiu spitgar – sedecididas igl onn current da puspei organisar fiastas en halla. Quei ch'ei semussau sco gronda sfida ils davos meins ei stau l'organisaziun d'in bus da notg che transportescha las visitadras ed ils visitaders dalla fiasta segir anavos a casa els vitgs ed ellas valladas. Per differents motivs ei per part ina collaboraziun cull'AutoDaPosta SA buca stada realisabla, aschia che per exempel las uniuns da giuventetgna da Surrein e da Vella han stuiu annullar resp. spustar lur fiastas. Era la purschida futura d'unviern dalla Steila Surselva naven da Laax ellas valladas dalla Surselva ei buca garantida. La Steila Surselva ei vegnida introducida igl unviern 2002/03 sin basa d'ina petiziun dalla Giuvna PCD Surselva che ha da lezzas uras pretendiu ch'ei duess vegnir purschiu allas giuvnas ed als giuvens indigens ina pusseivladad d'arrivar segir a casa dalla sortida.

Appell alla responsabladad

Oz, 20 onns pli tard, essan nus dil Giuven Center Surselva aunc adina digl avis ch'ina tala purschida sto en mintga cass vegnir reintroducida. Persuenter plaidan en'emprema lingua motivs da segirtad. Secundo ei la damonda per in bus da notg segiramein avon maun, ton pli ch'ils giuvens van aunc adina en sortida. Plinavon pon ins era evitar ch'ils giuvenils ston ir

tochen a Cuera per passentar leu la veta nocturna. La fin finala stuess ei esser egl interess ed era ella responsablada da nos presidents communal en Surselva da crear ina tala purschida per la generaziun giuvna. Quella purschida augmenta la qualidad da viver e promova l'identificaziun dalla giuventetgna a moda persistente culla Surselva. Schebein quei succeda el futur cull'AutoDaPosta SA ni sch'ei duei vegnir priu en consideraziun in'alternativa cun purschiders privats, valess en mintga cass ina ponderaziun.

Schebein ils giuvenils ed ils giuven carschi pon ir igl unviern proxim culla Steila Surselva en sortida stat aunc ellas steilas. Il Giuven Center Surselva spera denton fetg che las representantas ed ils representants dallas vischnancas e dalla Regiun Surselva percorschian e prendien era serius il basegn dalla generaziun giuvna. Nus vegnin en mintga cass a s'engaschar vinavon per la reintroducziun dil bus da notg – en tgei fuorma adina – ed a batter pil giavisch da numerusas persunas giuvnas da differentas vischnancas dalla Surselva.

Il Giuven Center Surselva